

VENDIM
Nr. 193, datë 2.12.2019

**MBI FILLIMIN E PROCEDURËS PËR PËRCAKTIMIN E ÇMIMIT TË BLERJES SË
ENERGJISË ELEKTRIKE TË PRODHUAR NGA BURIMET E VOGLA TË
RINOVUESHME, NGA DIELLI ME FUQI TË INSTALUAR DERI NË 2 mw DHE ERA
ME FUQI TË INSTALUAR DERI NË 3 mw, PËR VITIN 2019**

Në mbështetje të nenit 10, pika 3, të ligjit nr. 7/2017, “Për nxitjen e përdorimit të energjisë nga burimet e rinovueshme”, të vendimit të Këshillit të Ministrave nr. 369, datë 26.4.2017, “Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era” dhe “Rregullores për organizimin, funksionimin dhe procedurat e ERE-s”, miratuar me vendimin e bordit të ERE-s nr. 96, datë 17.6.2016, bordi i ERE-s, në mbledhjen e tij të datës 2.12.2019, mbasi shqyrtoi relacionin nr. 113/3 prot., datë 26.11.2019, të përgatitur nga Drejtoria e Tarifave dhe Çmimeve, mbi përcaktimin e çmimit të blerjes së energjisë elektrike të prodhuar nga burimet e vogla të rinovueshme, nga dielli me fuqi të instaluar deri në 2 mw dhe era, me fuqi të instaluar deri në 3 mw, për vitin 2019,

konstatoi se:

- ERE ka detyrimin e përcaktimit të çmimit të blerjes së energjisë elektrike të prodhuar nga burimet e vogla të rinovueshme, nga dielli me fuqi të instaluar deri në 2 mw dhe era me fuqi të instaluar deri në 3 mw, në përputhje me metodologjinë e miratuar nga Këshilli i Ministrave.

- VKM-ja nr. 369, datë 26.4.2017, “Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”, në pikën 2 të tij, ngarkon ERE-n me detyrimin për miratimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era.

- ERE-ja, me anë të vendimit nr. 205, datë 13.9.2018, vendosi “Mbi fillimin e procedurave për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli me fuqi të instaluar deri 2 mw dhe era me fuqi të instaluar deri 3 mw, për vitin 2018” dhe gjatë kësaj periudhe ka kryer analizat e saj në mbështetje të të dhënave dhe planeve të biznesit të shoqërive të licencuara të cilat kanë qenë subjekt i vendimmarrjes për çmimin e vitit 2017, të dhënave të marra gjatë monitorimit të kryer në zbatim të urdhrit nr. 71, dt. 24.1.2019, të kryetarit të ERE-s, si dhe të dhënat e planeve të bizneseve të të licencuarve që tashmë kanë marrë autorizimin dhe kanë lidhur kontratë me MIE-n, të cilët do të jenë subjekt i vendimmarrjes së ERE-s për vitin 2018.

- Gjithashtu është administruar dokumentacioni i paraqitur nga subjektet që kanë lidhur kontratë me Ministrinë e Infrastrukturës dhe Energjisë për ndërtimin e centraleve eolike.

- Nga shoqëria “Max Energy” sh.p.k., me anë të shkresës nr. 31 prot., datë 6.11.2019, është kërkuar miratimi i çmimit të shitjes së energjisë nga Impianti Eolik Topojë, Fier.

- Nga shoqëria “Windsbab” sh.p.k., me anë të shkresës nr. 18 prot., datë 12.11.2019, është kërkuar miratimi i çmimit të shitjes së energjisë nga Impianti Eolik Topojë, Fier.

- Nga shoqëria “Seman Eolik” sh.p.k., me anë të shkresës nr. 2 prot., datë 12.11.2019, është kërkuar miratimi i çmimit të shitjes së energjisë nga Impianti Eolik Topojë, Fier.

- VKM-ja nr. 369, datë 26.4.2017, “Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”, në pikën 2 të tij, ngarkon ERE-n me detyrimin për miratimin e çmimit të blerjes së energjisë elektrike të prodhuar nga kjo kategori prodhuesish e jo çmim individual për çdo aplikues që plotëson kriteret e përcaktuara në këtë VKM.

- MIE, me shkresës protokolluar në ERE me nr. 690 prot., datë 1.11.2019, shprehet se ka lëshuar miratimin për ndërtimin e impiantit gjenerues të energjisë elektrike fotovoltaike lundruese dhe veprave ndihmëse mbi rezervuarin e HEC Banjë, Bashkia Cërrik, qarku Elbasan, me kapacitet të instaluar 2 mw dhe duhet të vijojë me nënshkrimin e kontratës për këtë projekt, duke kërkuar nga ERE-ja parashikimin dhe përcaktimin e çmimit të blerjes së energjisë elektrike të prodhuar nga burimet e vogla gjeneruese fotovoltaike lundruese, duke sugjeruar që, për përcaktimin e çmimit të energjisë elektrike të prodhuar nga burimet e vogla gjeneruese fotovoltaike lundruese, të merret në konsideratë Metodologjia e vlerësimit të kostove të energjisë nga burime të rinovueshme e cila mbështetet tek e njëjta formulë e LCOE, sipas VKM-së nr. 369, datë 26.4.2017, “Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”.

Për gjithë sa më sipër cituar, bordi i ERE-s,

VENDOSI:

1. Fillimin e procedurës për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli (centralet fotovoltaike) me fuqi të instaluar deri në 2 mw dhe nga era (centralet eolike) me fuqi të instaluar deri në 3 mw, për vitin 2019.

2. Drejtoria e Çështjeve Ligjore, të njoftojë palët e interesit dhe Ministrinë e Infrastrukturës dhe Energjisë për vendimin e bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

NË MUNGESË DHE ME AUTORIZIM
ANËTARE E BORDIT TË ERE-s

Erjola Sadushi